

Notre Seigneur qui vous ait en sa sainte garde. Escript à Poitiers le xxviii^e jour de juing (1425).

Les lettres dudit chancelier qui de present n'est pas cy, lui ferons avoir le plus tost que pourrons.

Signé : YOLANT.

Et plus bas : THOREAU.

DU VICAIRE DE L'ARCHEVÊQUE DE REIMS, CHANCELIER DE
FRANCE.

A mes chiers et grans amis les Conseillers, bourgeois et habitans de la ville de Lyon.

Chiers et grans amis, je me recommande à vous, afin que sachiez des nouvelles de pardeça et en vous respondant à ce que avez escript du partement du Président. Vous en estes tous informez. Le Roy est en ceste ville, la Royne de Secile et y a esté Charles, monseigneur de Bourbon, conte de Clermont, monseigneur le Connestable, son frère, messeigneurs de Vendosme et d'Harecourt, plusieurs prelas, barons et chevaliers. Et se y sont tenus grans conseils et tant que la merci N.-S., tout est en tresbonne union. Et demain se part d'icy mondit seigneur le Connestable pour aller faire ses monstres à Saumur et de là en la frontière. Dedans un mois les gens du Roy, de la royne de Secille, de Monseigneur de Bretaigne seront devers Monseigneur de Savoie pour le traictié de la paix et croy que je irai. Et de présent le Roy et mondit seigneur le Connestable, envoient de leurs gens devers mondit seigneur de Savoie, entretenir la matière en attendant que soyons par-de là. Ecrivez moi de vos affaires envers le Roy et je y feray ce que je pourray.